

曾文正公奏稿

曾文正公奏稿

卷之三十目錄

彙報山東近日軍情相機調度摺

同治五年三月二十一日

銘樹兩軍在皖豫剿賊獲勝摺

全日

密陳剿捻尙無把握片

擒匪自山東回竄追剿獲勝摺

四月初七日

擬於運河增隄置柵片

曹徐淮泗剿捻勝仗摺

四月二十五日

查勘黃運情形片

彙陳各軍近日追剿情形摺

五月二十二日

彙報軍情檄調各軍防剿摺

六月十四日

防守沙河賈魯河片

任賴股匪回竄東路調兵分剿摺

七月初四日

捻股西竄仍辦河防摺

七月二十八日

湘軍迎剿張逆四獲勝仗摺

八月十二日

近日軍情片

捻股東竄河防無成現派軍追剿摺

八月二十三日

請飭李鴻章暫駐徐州調度軍務片

河防無成請寬疏防處分片

彙陳查辦民圩捻斬捻匪摺

全日

彙報山東近日軍情相機調度摺

同治五年三月二十二

奏爲彙報山東近日軍情相機調度恭摺仰祈

聖鑒事竊自張逆大股竄踞山東鉅野等處

臣飭各軍分投防

剿業於三月初五日奏明在案初三日臬司潘鼎新率師至鄆

城聞該逆在距城西北十八里之潘溪渡屯踞該處跨灘河南

北分峙兩寨被賊攻破其附近之孟家莊樊樓等處一片逆氛

初四日黎明潘鼎新督軍馳進行抵刁家河溝知寨賊未動當

分三路進攻潘鼎立步隊萬國順馬隊抄南寨前路唐宏成余

在榜步隊黃齊昂馬隊抄南寨後路戴春林吳從發潘國英等

進南寨中路該逆自兩寨出拒亦分三路來犯步賊居中馬賊

張兩翼環包先以左翼抄我前路潘鼎立等卽施放排鎗炸礮從後轟發賊不能包卽撤左翼聚於右抄我後路唐宏成等力戰卻之中路步賊吶喊齊進囂塵漲天我勇訖不稍動火箭洋礮分段齊發賊勢稍卻而孟家莊等處援賊蜂至我軍三路奮進礮無虛發該逆紛紛敗潰萬國順黃齊昂督馬勇追殺過河至北寨之西兩寨踞賊不能接應乃令潘鼎立唐宏成等與馬營一面追剿敗賊而戴春林等一面環攻兩寨該逆奪門狂竄被砍入濠及寨門踐死者無算潘溪渡南北兩寨立時攻克附近各莊登時竄盡其追剿之軍橫衝而前馬賊向北步賊向西不復成隊經我軍追殺各十餘里自辰至申斃賊千餘生擒二

百餘人奪獲牲口

百救出難民三千餘人查閱我勇受傷二

十餘人陣亡二人是夜該逆復陷踞蕭廳寨去潘溪渡十八九里附近各圩紛紛請救初六日潘鼎新率隊往攻至離寨八里之柳條圈賊卽排列步仗自西至東綿亙三四里以馬賊數團徑前衝突我軍列陣以待鎗礮連發馬賊紛紛敗竄步賊卽因之而靡萬國順黃齊昂黃金志馬隊三營見賊隊已亂分路猛追去步隊已遠賊馬忽從樹林後回撲如潮而來該三營猝然被挫直退至步隊紮處風塵障天人馬不辨幸部伍未動鎗礮連環轟擊傷賊頗多賊仍紛紛敗回我軍至晚始行收隊約計陣斃賊百餘名我軍亦傷亡四十餘人此潘鼎新一軍初四日

大獲全勝初六日馬隊小挫步隊小勝之情形也營務處李昭慶一軍自河南迤邐追賊而來行逾千里三月初五日馳抵嘉祥卽接潘鼎新函牘知該逆大股去梁山不遠有急欲渡運之勢李昭慶酌畱數營扼紮長溝而自挈八成行隊進剿初七日未至蕭廳寨三里許賊卽出隊來迎李昭慶令隊伍分爲兩路排進鎗礮齊施相持兩時之久賊勢不支我軍乘勝擁進寨中之賊見大隊敗退奪門而走立將蕭廳寨奪回李昭慶令各隊排列寨前不許入寨移時賊果整隊回撲我軍向前迎敵賊勢佯敗星騎右營馬隊追逼過猛陷入賊中營官陳王章中鎗墜馬弁勇搶護隊伍與賊攪亂親兵中營隨後接應被賊馬及長

槍隊圍裹困於垓心哨官裴兆宏吳坤田登時陣亡營勇傷亡過半營官朱公遠與賊搏戰危急之際風沙霾障不辨天日桂前護衛兩營前往救應與賊之槍隊對敵洋槍子如雨下賊旋倒旋進衝逼愈緊營官韓鳳昌曹仁賢力戰不退曹仁賢身受重傷馬賊仍向前奔突左右旋繞李昭慶加派護軍中營松字右營救應桂字前營松字中營忠樸左營救應護衛營又派溫德勒克西張士芳馬隊迎擊包抄各營槍礮齊發步賊紛紛倒地漸退馬隊槍斃紅衣賊目一名營官王芝生砍斃黃衣賊目一名該逆始全行敗走將重圍解開我軍日暮追至趙王河而返計陣斃賊目二名槍斃者不計其數弁勇陣亡一百餘人受

傷百數十人此李昭慶一軍初七日奪回蕭廳寨與賊力戰互有損傷之情形也自是之後賊踞黑虎廟相持數日十二三日該逆逐漸西走已去百餘里似有回豫之勢臣以沿河水套一帶地勢沮洳囑各軍穩慎前進潘鼎新率隊跟追十四日行至鄆濮交界之紅川口適遇大股折回北竄潘鼎新率五成隊伍爲方陣以禦之該逆以馬隊三起猛撲步隊繼進我軍鎗礮齊發乘勢逼壓每進一步賊退一步追至正西四五里外各營官鑒於賊馬回撲之悍不敢猛追當卽撤回截其尾隊擒斬三十餘人奪獲牲畜百餘此又潘鼎新一軍十四日接仗獲勝之情形也臣接據各路稟報十五日張逆仍回至黑虎廟一帶邊馬

及於運河西岸擾犯沈家口安山等處亟圖搶渡撫

臣

閻敬銘

督率東軍認真堵禦其任賴等逆亦卽於十五日竄入曹州圖與張逆合併數日以來張逆萃於濮范境內任賴萃於鄆鉅境內一片寇氛臣慮潘鼎新孤軍深入前後受敵已將該軍調回靳口兼顧運河北路令李昭慶各營分屯長溝趙邨兼顧運河南路目下但爲堅守之局與該逆力爭運河使不得東以待援軍之至劉銘傳一軍由湖北躡追任賴等逆二千餘里十八日可抵定陶周盛波一軍由歸德帶隊追賊十七日已至曹縣劉松山一軍臣飭令先其所急十八日由湖團起行不日可來濟甯應俟各軍先後到齊再行會商進擊楊鼎勛一軍行抵鄒縣

臣以曲阜無驚與閭敬銘往復函商檄令改赴韓莊八閘一帶
以防運河下游不知果足遏堵否所有潘鼎新一軍陣亡之花
翎游擊劉洪盛藍翎千總俞大錫李德明張希堯儘先千總劉
成浩儘先把總擬保藍翎千總金起元藍翎把總王國寶楊連
富把總吳正陞李福林外委孫幹清陳榮華李昭慶一軍陣亡
之都司裴兆宏都司銜守備段道益千總吳坤田蕭永祥朱占
鼐把總史兆龍江宏發方恒發汪保朝丁雙隆楊志淮于得寬
余德春李長勝外委張懷信奮勇捐軀均堪憫惻請
旨飭部查照各該員所保原銜從優議卹以慰忠魂所有彙陳
近日軍情相機調度各緣由恭摺由驛五百里馳奏伏乞

皇太后

皇上聖鑒訓示謹

奏

銘樹兩軍在皖豫剿賊獲勝摺

同治五年三月二十一日

奏爲銘樹兩軍在皖豫剿賊獲勝恭摺馳陳仰祈

聖鑒事竊任賴牛桂等逆自湖北回皖竄至江口集後徘徊於淮潁兩河之間劉銘傳一軍緊躡其後二月二十六日兵抵潁州與藩司英翰等會商進剿之策皖軍由大橋集前進銘軍由潁州西南前進二十七日抵小田市二十八日大雨如注劉銘傳派令各營趁雨中賊皆無備分路進擊劉盛藻率所部六營由楊家樓抄擊西路以烏爾圖那遜馬隊隨之唐殿魁率所部六營由梨樹寨抄擊東路以張景春馬隊隨之而自率黃蘭桂畢乃爾等五營并親兵馬隊由中路楊家圩前進甫經出隊該

逆哨馬見之立即棄館奔逃我軍追趕數里因賊去已遠雨勢過大遂令步兵收隊馬隊營總保成吉爾洪額六十七并張景春等追及之逆酋賴汝光率賊黨數千回頭迎撲經張景春等奮力擊敗該逆盡棄輜重過谷河狂奔而去我軍生擒百餘人中有賊目金天福馬太山二名奪獲騾馬多匹是夜官軍即駐楊家圩左右劉銘傳以重兵在東料賊必由西竄二十九日自率中軍并張景春馬隊前追而令劉盛藻唐殿魁保輜重以徐行午刻行抵白菓園即見賊隊當令各營停駐派幫帶官胡鳳喈率馬勇百名前探甫行二里許猝遇賊馬千餘來迎胡鳳喈見眾寡不敵且戰且退張景春率全部迎擊賊勢稍卻胡鳳喈

亦勒馬回剿崔萬榮劉盛瑞亦從兩旁包擊賊卽回奔張景春等正欲乘勝追殺忽西南出賊馬步二萬餘人分路來撲劉銘傳恐馬隊不利令黃蘭桂張士元兩營前往接應賊見步兵太少拚死來犯張景春令馬隊三營撤退與步隊相依羣賊將我騎步五營包在中心而以另股直撲親兵洋礮等營劉銘傳令畢乃爾等連開炸礮賊陣始亂張勝琦劉銘幹張佩之等衝入賊中生擒數人賊氣始沮是時劉盛藻率所部由西抄擊該逆乃棄黃蘭桂之圍併股迎之唐殿魁率所部并黃旗馬隊保成等亦由東繞擊而出各軍奮力齊進賊乃大挫奪路狂奔而皖軍張得勝程文炳適率所部從南路追來兩面夾擊共追殺二

十餘里途中賊尸狼籍奪獲器械數百件戰馬四十餘匹當查副將銜儘先參將胡鳳啗於被圍時中槍殞命弁勇亦傷亡數十人此二十八九兩日劉銘傳一軍在潁州追剿獲勝之情形也該逆被擊敗後一日夜疾馳至槐店張樹珊在周家口聞大股北趨之信三月初三日五鼓前進行抵苑寨見有賊馬多起正在該處渡過沙河遂令各營乘其不備一擁而進將該逆截爲兩段其大股在寨之東南層疊踵至先以馬賊數圍前來衝突我軍嚴陣以待用槍擊退隨派三營攻其左三營攻其右張樹珊親率正副兩營擣其中令馬隊直前衝陣該逆步隊萬餘人分股抗拒而馬賊數千分左右翼作包抄之勢我軍鎗礮齊

施刀矛迎刺殺賊甚眾左路之賊最爲驍悍於鎗子如雨中冒
煙死鬪總兵王得勝直前殪一賊酋總兵董大義領隊衝鋒賊
卻而復進者數次連用炸礮擊人馬紛紛倒斃賊眾散亂總
兵宋立新馳入盪決各軍乘勝縱擊賊勢不支自辰至未殺傷
千餘人該逆四散奔潰馬隊追逐維時賊之前股向周家口奔
竄意欲乘我遠出攻撲老營守營之副將張樹屏出隊迎剿張
樹珊亦率師回顧首尾夾擊賊無所遁於周家口下流冒死擠
渡窮力奔竄我軍追至日落始行收隊生擒僞天將徐昌先一
名僞福裕等賊目五十七名散賊百餘名奪獲騾馬百餘匹僞
天將印一方僞官照數十紙我軍亦微有傷亡此初三日張樹

珊一軍在周家口迎剿獲勝之情形也是夕張樹珊挑選小隊至大朱樓地方乘夜襲擊該逆驚逃頗有俘斬初四日大隊繼出追至淮甯北鄉之清河堰不及而還據該提督總兵各呈報前來臣查任賴等逆凶悍異常一月之間馳突三省經該兩軍節次邀擊足以稍折凶鋒張樹珊一軍臣仍檄飭駐紮周家口以顧四鎮根本之地劉銘傳一軍則令尾追緊躡迅赴山東頃已據報該軍於十二日由尉氏起行十八日可抵定陶矣此次銘軍陣亡之副將銜儘先參將胡鳳階并千總劉得發均堪憫惜相應請

旨飭部從優議卹以慰忠魂所有銘樹兩軍剿賊獲勝各緣由

理合繕摺馳陳伏乞

皇太后

皇上聖鑒訓示謹

奏

密陳勦擒尙無把握片

同治五年三月二十一日

再密陳者臣竊觀此股擒匪奔突六省攻勦十年久成流寇之症雖人眾不及髮逆而馬隊則數倍過之其凶狠之性狡詐之謀亦不亞於髮逆而中外論者輕視此賊以爲殆不足平古稱恐則致福驕則致敗若人人輕視劇寇則驕氣徧於數省豈有奏功之理明季流賊初亦或聚或散時盛時衰終遂至於不可收拾殷鑒不遠能無惴惴臣愚以爲欲求眾心之儆懼須先戒奏報之虛浮奏報之於兵事關係最重所奏果實則一軍之是非悉公

朝廷之賞罰亦當所奏若虛則勞苦多功者從而寒心巧僞儼

事者反以得志近日各路奏報頗多粉飾河南湖北兩省尤甚
河南今春屢報勝仗查詢實無戰事湖北報正月二十八日鄂
軍會同銘軍攻克黃陂查詢是日午刻劉銘傳率師克城追賊
西刻收隊并未見別有一兵來會至二更後鄂軍藍斯明劉維
楨等始至西門外駐紮今銘軍與鄂軍均准開單請獎有功者
與無功者毫無區別實不足以彰公道凡疆臣奏事皆據各將
領原稟入告本不能免於虛飾但須略加考察稍爲刪改俾黑
白不甚顛倒庶中材知所勸懲伏乞

皇上不咎既往微示將來於鄂豫暨各省奏報俯賜

鑒察殷勤訓誡其屢報勝仗毫無實際者

嚴旨詰責風氣一振不特疆吏悚懼卽幕僚草奏者亦不敢率爾命筆大局幸甚同治三年八九月後親王僧格林沁之師疲勞過甚鄧州呂堰驛羅山等處之敗失去戰馬三千餘匹精銳傷亡太多本不可以再戰向使

皇上灼知實情或令該親王回京休息數月或令在山東河南停兵養銳亦何至有曹南之禍乃各省奏報皆稱捻匪最畏僧格林沁不敢與之交戰或稱殘孽無多殲除在即

朝廷不得確耗早爲之所遂致隕喪賢王忠良短氣遐邇震驚臣痛念及此未嘗不歸咎奏報失實有誤大局也自臣接辦此賊設四鎮駐防之卒籌大枝游擊之師意謂且戰且守或可漸

有頭緒及此次入齊與張總愚股匪相遇本月初旬三次接仗
兩次挫衄張逆人數較少卽已驍悍若此況益以任賴等逆之
眾尤覺難操勝算總緣賊馬逾萬數倍我兵曠野平原步不敵
騎臣屢思多練馬隊不特湘淮各勇騎射非其所長且臣所派
兩起買馬之員均據稟稱去冬大雪苦寒口外馬瘦且少不敷
購辦臣處欲添千餘騎而不可得鮑超欲買三千餘匹未知成
軍更在何日臣受

命勦擒已滿十月制寇之方尙無把握終夜以思且憂且愧外
閒不察或以迅速成功相期每日所接賓僚無非譽言所閱文
牘無非諛詞不曰旦夕可滅卽曰賊無長技此等浮言虛譽旣

恐傳播行間長部曲驕矜之氣亦恐上達

天聽弛

朝廷兢業之心臣因此次小挫將各軍痛加儆戒尤願我皇上弗輕視此賊常以流寇難治爲慮博儲將材以求爲可繼稽核奏報以戒其勿欺庶憑

聖主朝乾夕惕之懷終救中原火熱水深之厄區區微忱謹據實附片密陳伏乞

皇太后

皇上聖鑒訓示謹

奏

擒匪自山東回竄追剿獲勝摺

同治五年四月初七日

奏爲擒匪自山東回竄各軍追剿疊獲勝仗恭摺仰祈

聖鑒事竊張賴等逆全股萃於鄆濮一帶各軍堅守運河劉銘

傳等跟追來東

臣

於三月二十一日奏明在案臬司潘鼎新自

接奉

臣

檄後卽由梁山拔赴靳口駐紮十九二十等日率隊巡

運河之西岸行抵安山卽見賊馬充斥該軍整隊而進北至戴
廟賊見運河東岸東軍防守嚴密而西岸又有梭巡之兵萬難
飛越始輟渡運之謀卽於二十一日向西南回竄屯聚鄆鉅之
交劉銘傳周盛波兩軍亦於二十一日同抵鉅野逼賊而軍二
十二日會商進剿之策劉銘傳由鉅城西北出隊行十餘里遇

牛洪前隊經黑龍江馬隊猛進擊之生擒三十餘人賊遂奔潰張景春馬隊從後追擊不及而還周盛波由鉅之正北出隊亦行十餘里與逆黨相遇該軍排隊直前斬獲數十人奪馬十餘匹該逆不肯戀戰遽向西南狂奔此賊棄運河而返銘盛兩軍迎剿各獲小勝之情形也二十三日劉銘傳率眾跟追行過韓氏橋十餘里卽見賊之馬步大隊與銘軍相距五六里該逆將步隊藏於村樹林中以馬賊逕撲張景春之師尙未交鋒遽行返奔劉銘傳知其詐敗不令追逐該逆仍結隊南行劉銘傳亦率眾南趨與賊并驅旌旗相望行抵烏官屯賊驅老弱西走張總患自率悍黨排紮不行劉銘傳令各營輜重盡歸烏官屯派

劉盛藻偕張景春之馬隊由南迎戰唐殿魁由中迎戰而自領中軍及黑龍江馬隊由北迎戰賊見黑龍江馬隊蜂擁來撲保成等施放洋槍斃賊數名賊勢稍卻畢乃爾連用炸礮轟擊黃桂蘭劉明幹率隊殺入張景春吉爾洪額六十七等乘勢抄追擒斬悍賊十餘名馬賊大潰步賊亦退劉盛藻唐殿魁見北路之賊已敗各督隊猛進甫開槍礮賊卽潰走該營官等鑒於前次之詐猶不令猛追該逆退至四五里仍跑隊南行其時銘軍已行五十餘里劉銘傳慮其疲乏商詢各營兵將俱願奮力一戰不肯休息遂率黃桂蘭畢乃爾等由南路擊賊之首唐殿魁由中路擊賊之腰劉盛藻由北路擊賊之尾保成及張景春馬

隊俱由北路抄擊張逆亦分股迎撲左右兩軍牛逆迎撲中軍
進抵龍垵集西畢乃爾李錫增各放炸礮牛逆勢甚怯弱不敢
前進張逆以馬賊抄我馬隊之後而步賊拚死撲我步隊劉盛
藻派馮汝霖等兩營迎戰自率劉盛休等四營接應唐殿魁派
滕學義等兩營迎戰自率周志本等四營接應張景春保成等
各以馬隊一營迎戰兩營接應馬賊先與我交鋒未分勝負步
賊從後擁進丁汝昌滕學義等各放排槍斃賊滿地賊猶持矛
猛進惡戰片時唐殿魁督軍一呼如牆而進殺賊五六百人餘
皆棄矛奔逃馬賊見步賊潰敗齊來救應復被劉盛藻等擊敗
張景春保成等縱馬追殺所向披靡劉銘傳見張逆馬步俱敗

亦令黃桂蘭等率勇衝擊牛逆之隊該逆卽棄矛回奔殲殺者
百餘人餘賊向西潰去我軍追奔十餘里暝黑收隊當查營官
馮汝霖頭受矛傷弁勇傷亡數十名奪獲長矛千餘桿戰馬百
餘匹此二十三日劉銘傳一軍在龍洞集大獲勝仗之情形也
周盛波一軍自鉅野接仗後訊據生擒賊供張牛等逆欲由歸
德回竄蒙亳老巢該軍畱於歸德僅帶八成行隊來東二十三
日趕回防所是夕宿章縫集次日大雨如注二十五日探知逆
股竄向城武拔隊疾馳申刻遙見賊隊周盛波派周盛傳率步
騎四營前進至城西二三里許該逆大股蜂擁而至見官軍人
數極少猛力攻撲我軍屹立不動槍礮環擊鏖戰逾時馬隊橫

截而出營官周行發手刃逆首張大發一名賊眾立潰適周盛波各營亦至前後掩殺共斃賊匪二百餘名我軍亦微有傷亡二十六日周盛傳仍率原隊前進至荷澤之侯家集該逆正在分攻各寨而其新破之游莊寨毫無準備周盛傳揮兵直進一擁而入殺斃賊眾百餘名就地紮住該逆糾黨還撲力戰卻之周盛波於二十七日黎明趕到與周盛傳會合一處探知張牛二逆之精銳盡聚於此令各軍先行紮營然後進剿該逆見我軍分布營壘乃搶踞前後大莊三處拚死來戰我軍一面施放洋槍炸礮一面趕築營牆頃刻而就周盛波派周盛傳等三營剿中路周壽昌等三營剿右路賈啟勝等三營剿左路而自率

親兵小隊及周行發馬隊接應該逆亦分股來敵騎賊前後包衝我軍洋槍炸礮分段齊發往返回合鏖戰極苦槍矛交集一處前者死傷枕藉後者猶冒煙直上經周盛傳指揮連斃賊目十餘名賊隊始亂各營乘勢掩殺賊乃奔潰追逐五六里哺時收隊是役我軍僅二千餘人賊過十倍自辰至酉終能冒險制勝營官周盛傳衛汝貴楊安典楊正國均受矛傷弁勇傷亡者百餘人其夜二更以後周盛波派隊於方埠賊巢之外逼紮兩營二十八日大隊繼進張逆正出隊抗拒我軍用炸礮轟塌土牆攻克該圩捻眾紛紛奪門向東南逃竄圩內搜殺又數百弁救出難民五六百人此二十五六二十七八等日周盛波一軍

追剿大勝一次小勝三次之情形也劉銘傳一軍於二十七日
向晚至曹縣探知近城有賊不辨何股令選小隊於三更後潛
至賊館分三路掩襲中左二路賊哨驚覺悉數逃去右路滕學
義朱起昌等撲入賊館賊俱無備殲殺數十名奪獲騾馬百餘
匹又獲小勝一次據該提鎮等先後呈報前來臣查此次擒黨
全數東竄銳意搶渡運河就食完善之區潘鼎新潘溪渡一捷
首挫兇鋒厥後初六十四等日接仗及帶隊梭巡西岸牽綴賊
勢使不得壹意東渡該軍於上年六月由蘇州進衛畿輔盛暑
航海輪船酷熱物故者多自駐防濟甯去秋之季今春之杪均
以力戰保全東境應懇

天恩准臣將潘鼎新一軍開單保獎以示鼓勵山東諸軍扼防
遼河屢次撲犯均經擊退爲昔年所未見併懇

天恩准開敬銘擇尤保獎以策效於將來臣調齊各軍以次進
逼本可合圍痛剿乃該逆違折而南趨未加懲創正深焦灼幸
劉銘傳龍壩集之捷殺傷精銳頗多周盛波游莊寨之捷以少
勝衆冒險立功有此兩戰足以稍快人心所有銘軍出力之營
總藍卽恩騎尉保成請以防禦儘先補用

賞換花翎佐領吉爾洪額六十七均請以參領補用吉爾洪額
并請

賞換花翎其餘出力員弁仍歸黃陂案內彙獎涼州鎮總兵周

盛波兄弟竭力苦戰膽智俱優可否

頒賞搬指等物交周盛波周盛傳祇領分藏之處出自格外
鴻施其所部盛軍出力員弁暫行存記俟續有戰功再爲請獎
所有擒逆自山東回竄各軍追剿疊獲勝仗緣由恭摺由驛五
百里馳奏伏乞

皇太后

皇上聖鑒訓示謹

奏

擬於運河增隄置柵片

同治五年四月初七日

再臣接據各路稟報擒黨大股自二十三日與銘軍接仗後卽分股南趨張牛等逆被周盛波二十七日擊敗連日竄往歸德虞城旋又由豐縣折回單縣徘徊不去似有回竄曹濮之意劉銘傳一軍初三日由虞城馳抵單縣之黃岡集緊躡其後臣檄飭李昭慶一軍由金鄉馳赴單縣與銘軍會同剿辦而仍以潘鼎新之軍畱防濟甯長溝一帶備賊回竄劉松山一軍前已調至濟甯因賊眾回竄又令趕回湖團周盛波一軍已於二十九日趕回歸德因聞賊有分竄雒河者又於初四日拔赴亳州究竟蒙亳是否有賊係何酋分股臣尚未聞其詳也至任柱等一

股則先由永城碭蕭竄至睢甯境內之雙溝初二日馬賊已撲近阜河洋河等處距宿遷不遠該縣現有襄辦軍務侍講學士劉秉璋一軍駐防與上游密灣等處吳棠派出之軍韓莊八閘楊鼎勳之軍聲勢尙爲聯絡該學士昨來濟甯臣晤商一切聞警後卽日馳回宿遷布署一切將來卽移所部駐紮徐州居四鎮適中之地仍作一路游擊之師臣本早擬查看黃運兩河因賊蹤去而復返盤旋不定遲遲未行臣以東北則畿輔爲天下之根本東南則江蘇爲臣軍之根本屢經奏明注重東路旣以東路爲重不得不藉運河衣帶之水以爲流寇阻截之界惟河淺且窄汎長千有餘里防不勝防臣擬會同閩敬銘等大加修

浚增堤壘柵能否確有把握俟查勘後續行具奏謹先附片陳明伏乞

皇太后

皇上聖鑒訓示謹

奏

曹徐淮泗剿捻勝仗摺

同治五年四月二十五日

奏爲捻逆兩股竄擾曹徐淮泗各軍分路剿辦恭摺仰祈
聖鑒事竊捻逆自山東回竄各軍追剿獲勝業於四月初七日
奏明在案張總愚牛落紅一股經劉銘傳周盛波擊敗後連日
盤旋於虞陽豐單四縣之間劉銘傳一軍由虞城馳抵單縣之
黃岡集緊躡其後初三四五等日節次與該逆相遇頗有斬擒
賊向東南奔竄初七日撲近湖團劉松山出隊迎剿旋又折回
單縣十一日竄至城武十二日圍攻曹縣十三日竄至冉堦集
十五日復圍曹城適李昭慶一軍由城武劉松山一軍由豐縣
同時趕至會擊立解城圍是夕李昭慶與劉松山會商進剿之

策以湘軍爲左路以淮軍爲右路兩軍議定相距三四里互爲應援十六日李昭慶等督軍前進離營數里賊卽分路來撲李昭慶飭令各營屹立不動洋鎗洋礮連環轟擊賊隊已亂我軍馬隊始從樹林內突出橫衝右路之賊全行敗走李昭慶登高瞭望見賊馬六七百匹步隊千餘人向南繞竄折而東北圖撲後路營壘一面傳知各營嚴備以待一面調派桂字三營向南截剿復將另股撲營之賊登時擊退斃賊甚多其撲犯左路之賊劉松山飭派記名總兵李榮貴等各營分三路進擊而自率親兵督戰部署甫定賊馬數千已向前衝突各軍鎗礮齊發轟擊半時之久賊馬傷斃者頗多該逆知衝陣不動遂從兩旁包

抄而以步隊大股合力猛撲各營穩持如故奮勇鏖戰槍矛并
刃十盞十決賊勢不支紛紛敗潰另股之繞過南路牽制官軍
者亦經我軍擊退計鎗斃殺斃者幾及千名奪獲驛馬六十餘
匹湖軍陣亡者十三人受傷者七八十名幸獲大勝張牛等逆
遂由曹南奔潰是日劉銘傳一軍適由礪山而來復過於王閭
集劉銘傳督軍迎戰我軍馬隊先與馬賊交鋒生擒十餘名鎗
斃數名步賊旋蜂擁而至各軍鎗礮齊發賊猶冒煙猛進經周
志本張士元等持矛惡鬪將接仗悍賊數百名殲斃殆盡賊勢
大奔銘營乘勝追殺陣斬者約四百餘名鎗礮斃者尤多獲
戰馬五十餘匹弁勇傷亡者亦數十名戰罷後劉銘傳與李昭

慶劉松山會晤該逆悉數向曹縣東南竄走十八日各軍拔隊跟追二十日賊已竄至豐縣旋竄銅沛此張總愚牛落紅等一股竄擾曹徐之交湘淮各軍十六日力戰獲勝之情形也至竄近宿遷清江一股是爲賴文光任柱李允等酋該逆於初七八等日攻撲運河防守嚴密技不得逞遂折竄泗州靈璧連日盤踞該處有搶割二麥之意臣檄飭派駐臨淮之王永勝一軍刻日渡淮就剿靈泗一帶又調古州鎮總兵劉士奇七營渡江移紮宿遷騰出劉秉璋與楊鼎勳兩軍除酌留數營扼防韓莊八閘外其餘概作游擊之師專辦靈泗睢宿及蘇皖交界各州縣該三軍尙未拔行頃聞泗州之賊業已南竄未知又向何處周

盛波一軍自移營亳州後重修濠牆料理糧仗聞該逆盤踞泗
鹽十八日率隊由宿州進剿其臨淮一鎮有編修張錫幬陸營
會同水師防守不至侵犯淮南此賴文光任柱等逆竄擾淮泗
一帶各軍防剿之情形也臣查此次捻黨由山東回竄分爲南
北兩大股久踞曹徐淮泗徘徊不去一則各屬二麥既熟乘勢
搶割以圖一飽一則牽制我軍冀乘不備襲渡運河竄入齊蘇
完善之區實屬狡譎異常計臣軍之剿辦北路者則有劉銘傳
李昭慶劉松山等三支剿辦南路者則有周盛波一支而劉秉
璋王永勝亦已改爲游兵或可一收夾擊之效惟劉銘傳一軍
自去年臘月以來援鄂援皖援豫援齊馳驅四省將士疲勞已

極頃據該提督呈請休息一二月藉資整頓臣已批准飭令該軍移赴濟甯駐紮騰出潘鼎新一軍代爲游擊之師如此更番遞戰庶軍士不至過勞亦可以保其常新之氣於剿辦似有裨益所有捻逆兩股竄擾曹淮泗各軍分路剿辦緣由理合由驛五百里馳奏伏乞

皇太后

皇上聖鑒訓示謹

奏

查勘黃運情形片

同治五年四月二十五日

再臣擬將運河查勘一次大加修浚業經陳明在案本月初七日會同撫臣閻敬銘由濟甯啟行沿河查閱自微山湖以北至長溝止有潘鼎新一軍駐守足敷分布長溝以北至開河一段向恃有南旺湖水故未設防茲查湖水全涸已由閻敬銘添撥防兵開河以北至靳口一帶水勢稍淺牆壘較低自靳口至安山戴廟水勢甚深差爲可恃自戴廟至沈家口十八里夏秋黃河灌運水極深廣冬春沙淤河乾殊難守禦現經閻敬銘籌議條款督同文武將領剋期興工無論河深河淺均增高牆深濠以輔之其沙地及民圩不能掘濠者酌立木柵以補之運河閱

畢之後初十一等日與直隸督臣劉長佑會晤三人同閱黃河若非隆冬冰堅防守尙易爲力十三日還至安山由陸路至東平泰安查看形勢因便一登岱岳十九日仍回濟甯防所濟甯以下微山湖長一百八十里無須設防自湖以南運河淺深不等議定八開暨宿遷等處由學士劉秉璋派兵防守密灣暨成子河等處由漕臣吳棠派兵防守總期力扼此河不使該逆流竄齊蘇膏腴之地未知果否有裨理合附片具陳伏乞

皇太后

皇上聖鑒訓示謹

奏

彙陳各軍近日追剿情形摺

同治五年五月二十二日

奏爲彙陳各軍近日追剿情形捻黨分股回竄豫皖恭摺仰祈
聖鑒事竊捻逆兩股竄擾曹徐淮泗各軍分路剿辦業於四月
二十五日奏明在案張總愚牛落紅一股在曹縣經李昭慶劉
松山等軍擊敗後四月二十日竄至豐縣次日竄入沛縣二十
三日至徐州城西十餘里總兵董鳳高李祥和各以兩營分路
出隊擒獲數十名該逆旋即退去是夜李祥和派兵潛劫賊營
薄有擒斬奪獲賊馬十餘匹二十五六等日該逆竄至銅山之
雙溝楊家窪一帶二十八日竄至宿遷之埠子鎮洋河集逕撲
運河二十九日逼近桃源三十日襄辦軍務江蘇臬司劉秉璋

督軍馳至洋河集探知賊之大股在圩外五六里紮住馬步萬餘人四出焚掠劉秉璋派令總兵吳長慶況文榜等各帶五成隊伍於三更後徑擣賊巢斬擒近七十名五月初一日黎明收隊隨卽傳令各營整隊出擊該逆且戰且走吳長慶況文榜等由舊河隄內外分路夾擊追過倉家集賊陣大亂斃賊甚多該逆另以六七百騎步賊千餘由倉家集西北包出我軍之後直撲營壘守營將士槍礮排擊王占魁率隊回援陣斬三十餘名槍斃賊目二名始全數退走與倉家集之賊合併西趨弁勇陣亡受傷者各十餘名初三日該逆由睢甯之歸仁集回竄適劉松山一軍由徐州追賊而來行抵離城十八里之王家林歸具

賊馬紛紛逼近劉松山一面督飭各營趕築營壘一面派隊迎敵部署甫定賊馬千餘向前衝突各營槍礮齊發穩擊逾時步賊大股踵至各營奮力齊進賊勢不支退至里許馬賊復從兩旁包抄我軍隊伍穩持如故力戰良久賊始敗去計斃賊近三百名弁勇陣亡者四名受傷者二十名此劉秉璋一軍初一日在洋河劉松山一軍初三日在王家林各與張逆接仗獲勝之情形也初四五日該逆晝夜攻撲早河及利運閘馬家渡一帶均經水師鄧長里等擊退由是不復圖犯運東乃由利國驛回竄銅山初八日劉松山進至銅山之苑山圩據報賊之後隊相距僅八九里比卽整隊前進行至魏家莊已與賊遇營壘猝不

及修劉松山飭令各營將輜重圍聚一處以四成隊固守以六
成隊分三路迎擊頃刻斃賊數十名該逆馬步均不肯戀戰紛
紛向西南竄走各營乘勢猛逼七八里沿途又斃賊百餘名將
該逆截爲兩段一段向西北荆山橋李家瓦房而去一段向西
南楊家集而去共計斃賊二百餘名生擒十四名弁勇受傷者
十七名其賊之前隊已於初七日竄近徐州是時劉銘傳方赴
濟甯與臣晤商一切其部將唐殿魁劉盛藻分帶銘軍駐紮徐
州以賊氛逼近郡城初八日會商董鳳高出隊行抵離城十八
里之趙莊寨偵知賊之前隊盡在荆山橋河左右馬隊張景春
保成等渡河直前接仗黃桂蘭劉朝幹等步隊三營渡河接應

李錫增畢乃爾兩營隔河施放炸礮鏖戰逾時馬賊敗入河中
上爲步隊兜擊下爲荆山橋所阻被我軍掄斬甚眾該逆悉數
敗過河東唐殿魁等督軍追至十餘里而還奪獲賊馬二百餘
匹斃賊約計百名此張逆自宿遷桃源回徐劉銘傳劉松山兩
軍初八日兩處接仗獲勝之情形也任柱賴文洸等大股自四
月十三日窺撲泗州城後旋復竄擾宿州二十三日竄至永城
縣東湖莊寨正在圍攻之際周盛波馬隊一營先到突衝賊隊
掄斬數十名賊眾潰退該營卽在胡莊寨駐紮與步軍相離尙
十餘里二十四日周盛波率軍前進行甫數里該逆分三路來
撲以馬隊猛撲中路周盛波督令童邦傑等排列隊伍併力禦

之洋槍炸礮迎頭轟擊該逆抵死不退當派都司周行發率領馬隊由城西抄入賊後賊始驚潰其前路步賊經周壽昌等擊敗後路步賊亦經周盛傳等擊敗自辰至暮各營終日未餐計斃賊近二百名奪獲騾馬頗多弁勇傷亡者十餘人二十六日該逆竄往歸德二十八日與豫軍接仗三十日又折回永城夏邑之交初二日二鼓周盛傳率隊掩襲小有俘獲初三日由蕭縣之西竄入銅山初八日擾及東賀邨將與荆山橋張逆之股相合適原駐徐城之張詩日李祥和等營出隊至土山寺而周盛波追軍適至遂會商進擊又擒斬百餘名此周盛波一軍二十四初八等日在永城及徐州兩次接仗獲勝之情形也初八

以後張牛一股由豐縣碭山竄至虞城以西任賴一股由桃山至宿州竄入懷遠渡渦河而南盤踞下蔡等處臣查該逆自二月北竄以來堅圖渡運前在山東鄆城一帶搶渡後在江南宿遷一帶搶渡徘徊曹徐淮泗者兩月有餘迄不得逞雖足伐其東渡之謀尙未挫其兇悍之氣現在張逆入豫任逆入皖臣已檄飭潘鼎新會同周盛波兩軍爲一路劉松山會同張詩日等兩軍爲一路專剿張牛一股劉秉璋會同楊鼎勳爲一路專剿任賴一股無論該逆竄往何處均與之縱橫馳逐未知能否有濟至劉銘傳一軍改調在徐州駐紮休息騰出劉秉璋全部概作游兵李昭慶一軍以八營赴防韓莊以十營赴防濟甯駐紮

休息騰出潘鼎新楊鼎勳兩軍概作游兵潘鼎新已於十五日
拔隊起程前赴歸德矣所有彙陳各軍近日追剿情形捻黨回
竄豫皖各緣由理合由驛五百里馳報伏乞

皇太后

皇上聖鑒訓示謹

奏

彙報軍情檄調各軍防剿摺

同治五年六月十四日

奏爲彙報近日軍情并檄調各軍防剿事宜恭摺仰祈

聖鑒事竊各軍追剿捻逆分股回竄豫皖臣於五月二十二日

具奏在案牛落紅一股自五月初八日被我軍擊敗後不能與

張總愚合併周盛波督軍跟追十五日行至永城之同和集探

知牛逆欲由白龍王廟竄過渦河遂催督各營連夜窮追十七

日五鼓抵白龍王廟該逆已竄過渦河周盛波趕搭浮橋渡河

派周盛傳由西路進劉啟福等由東路進周壽昌等由中路進

而令陳明昇周行發各帶馬隊一營從兩旁衝截牛逆勢已窮

蹙疾驅悍賊數千人賊中所謂內五營者蜂擁回拒我軍馬步

各營分路猛擊賊眾冒死抵敵周盛傳坐馬被賊矛刺倒徒步交戰兵勇皆殊死格鬪賊始大敗正追逐間有步賊一股逃入路旁廢圩周壽昌率師衝入圩內搜殺淨盡無一脫者餘賊向南飛奔我軍追殺二十餘里牛逆踉蹌逸去周盛波晝夜追逐十八日至亳州十九日至鹿邑西南之馬家寨該逆已竄入陳州境內馳逐四百餘里人馬俱困將士多病卽在馬家寨休息此周盛波一軍大破牛逆股匪之情形也任柱賴文洸一股自五月初由宿州西竄盤踞鳳台縣屬之平阿山一帶與皖軍張得勝等相持日久擄脅益眾二十三日王永勝一軍趕至懷遠二十五日劉秉璋一軍趕至蒙城周盛波亦自馬家寨回援二

十六日至潁州東五十餘里之棗莊集賊聞援師四集遂自平
阿山全數西竄欲由潁郡之畱陵口偷渡沙河竄擾光固適遇
盛軍突至遂折向東北竄逸繞至烏江河上游意圖抄襲我軍
後路周盛波麾軍三面齊進洋槍炸礮連環轟擊逆勢不支向
西狂奔奪獲牛騾器械頗多解散脅從難民千餘人二十九日
賊竄至太和初一日竄至港溝劉秉璋與皖軍英翰等次第跟
追此周盛波與任賴股匪接戰小勝及各軍追剿之情形也張
總愚一股自五月中旬由虞城西竄潘鼎新與劉松山張詩日
三軍追剿二十一日同抵甯陵探知該逆已至睢州城南之河
陽集因會商次日均至睢州察看形勢該逆知官軍緊躡其後

不敢停畱二十一日一撲陳州城下旋即退去二十二日竄近周家口之北寨牛逆亦由苑寨偷渡河南與張逆分而復合駐防周家口之右江鎮總兵張樹珊派副將閃鳳來馬隊迎擊殺賊數十名奪獲騾馬四十餘匹是夕復分隊雕剿該逆不敢迎戰連夜由逍遙集一帶渡過沙河張逆自鄆城西遁牛逆自商水西遁均奔遂平確山一路訊據生擒賊供均稱該逆欲由信陽竄往光固六安斫取竹子補製兵器等情此張樹珊一軍迎剿張牛一股薄有斬擒及各軍跟追之情形也臣查擒逆各股回竄豫皖兩省中原平曠之地四通八達若不擇地設防此剿彼竄終不能大加懲創上年劉銘傳帶兵入豫察看地勢即創

扼守沙河之議驅賊於沙河以南以蹙其勢臣以彼時兵力未齊未遽允行今張牛等逆既渡沙河以南任賴等逆亦將渡沙渡淮并趨南路本年防守運河麤有成效應卽仿照於沙河設防俾賊騎稍有遮攔庶軍事漸有歸宿惟查沙河上流直至邳縣汝州地段太長幾無止境臣博詢眾議擬自周家口以下至槐店止扼守沙河自周家口以上至朱仙鎮止扼守賈魯河由臣派兵設防自朱仙鎮以北四十里至汴梁省城又北三十里至黃河南岸無河可扼挖濠守之由李鶴年派兵設防自槐店以下至正陽關仍守沙河由喬松年派兵設防自正陽關以下卽係淮河由臣派水師與皖軍會防各分汛地層層布置或者

漸逼漸緊逐捻於西南山多田少之處官軍較易爲力現已檄
令劉銘傳自徐州拔赴沙河與潘鼎新張樹珊等熟商防守之
策并咨商河南安徽兩撫臣調兵分防皆憑人力以堅守不以
地險爲可恃至羣賊南竄不出南汝光固黃州六安等處則鮑
超所統之霆軍劉秉璋楊鼎勳王永勝所統之淮軍劉松山張
詩日所統之湘軍分路游擊亦尙足敷剿辦臣擬於十五日拔
營東下閱看宿遷桃源一帶隄牆卽由運入淮汴流而上逕赴
周家口沿途察看賊情地勢續行奏報所有近日軍情及檄調
各軍防剿事宜理合由驛五百里馳陳伏乞

皇太后

皇上聖鑒訓示謹
奏

防守沙河賈魯河片

同治五年六月十四日

再臣於四月初先擬挑濬賈魯河置船設防專函商諸東河督臣張之萬旋准覆稱賈魯河沙淤已久萬難興挑詢之河南紳士言亦相同沙河上下千餘里地段太長防此兩河本係極難之事惟念臣處馬隊不敵賊騎戰事既無把握不能不兼籌守事且防河之舉辦成則有大利不成亦無大害是以仍就前議竭力興辦劉銘傳首畫此策即令其與潘鼎新張樹珊會防力任其難扼守朱仙鎮以下四百里其自朱仙鎮以上必須專資河南兵力撫臣李鶴年現已移駐許州豫兵已赴西路追剿臣趕辦河防咨商李鶴年請其暫駐省城調回各軍先圖近守不

必遠剿查自朱仙鎮以北至河南省城四十里又自省城以北至黃河南岸三十里以豫省各軍全力守此七十里似乎頓兵不進難免外閒浮議然此七十里者全係沙地開挖深濠猶恐旋開旋壅汎地雖少防禦甚難但使扼防得力將來可與追剿之兵同一論功請獎本年三月山東兩軍先在曹州迎剿均經失利後在運河扼防均稱得力臣曾奏請獎敘蒙

恩允許河南兵不甚多即可仿照山東辦理不貪馳剿之虛名或收制賊之實效臣於軍事辦未就緒者向不輕於具奏因臣主聚兵防河之說恐使李鶴年蒙頓兵不進之譏不得不預先奏明可否請

旨飭李鶴年暫駐汴梁調齊各兵先辦朱仙鎮以北防務設兩河防務不能辦成或有損於大局臣願獨當其咎不與李鶴年相干除由臣詳細函商外理合據實附陳伏乞

皇太后

皇上聖鑒訓示謹

奏

任賴股匪回竄東路調兵分剿摺

同治五年七月初四日

奏爲任賴股匪回竄東路調兵分剿恭摺仰祈

聖鑒事竊

臣檄調各軍防剿并議扼守沙河賈魯河等情於六

月十四日具奏在案

臣拜摺後卽於十五日由水路東下沿途

水勢盛漲南陽微山等湖與運河連成一片春間所修隄牆自韓莊以下八閘兩岸較高砂土質鬆大雨之後多已坍塌自黃林莊以下二百餘里兩岸較低隄身或露二尺有餘或露數寸一尺或全淹水中隄外亦皆積水如湖節節均有決口與隄內之河水互相出入目下茫茫巨浸賊匪斷難飛渡將來秋深水落竟須全數另行興修二十五日行抵宿遷縣二十七日准山

東撫臣閻敬銘咨稱據曹縣稟任賴兩逆因張市朱仙鎮等處
河水驟漲不能西渡仍由扶溝太康回竄已至杞縣之沙窩睢
州之芋香鋪勢將直趨曹境七月初一日又淮河南撫臣李鶴
年咨稱據睢州稟報十八日該州西南之馬頭寨已被賴逆攻
破占據豫兵不敷馳剿咨商撥兵救援各等情臣查扼守沙河
賈魯河之議必俟擒逆各股全趨沙河以南方可與辦現在任
賴一股既爲沙河大水所阻不敢西行折而東竄則防河之策
斷難遽行應卽先行撥兵馳剿劉銘傳接臣飭守沙河之檄業
於六月二十三日自徐州拔行潘鼎新一軍前在西華周盛波
一軍前在太和此三軍者本擬分防沙河現今移赴睢州曹考

一路專辦沙河東北之賊而鮑超之霆軍劉秉璋楊鼎勳王永勝之淮軍劉松山張詩日之湘軍仍辦沙河西南之賊頃已分別咨行相機剿辦惟自五月下旬以後淮南北諸郡大水爲數十年來所未有積潦盈途深過馬腹軍中米糧子藥車載夫運寸步難行不特各軍拔隊因之濡滯卽處文報往來亦多阻隔遲誤而秋稼被淹民廬漂沒臣旣自憾調度乖方軍務毫無起色又恐飢民失所不免從賊以圖養生剿辦撫綏兩俱棘手籌思反覆憂愧實深臣在宿遷傳聞數日初聞捻蹤回竄之信本擬改駐徐州就近調度惟賊蹤既分兩支無論臣駐何處均有不能兼顧之勢入豫之議不可再緩俟與漕臣吳棠會晤後

卽在楊莊換船由湖沂淮逕赴陳州周家口籌辦一切所有任
賴兩逆回竄東路調兵分剿緣由理合由驛五百里馳陳伏乞

皇太后

皇上聖鑒訓示謹

奏

擒股西竄仍辦河防摺

同治五年七月二十八日

奏爲潘鼎新一軍迎剿獲勝任賴一股竄至賈魯河以西現仍辦理河防恭摺仰祈

聖鑒事竊任賴等逆回竄東境調兵分剿臣於七月初四日在宿遷馳奏在案山東臬司潘鼎新一軍行至西華縣爲大水所阻該司銳意剿賊於六月二十日令各營晁水而進二十二日行抵太康探知太康之崔橋杞縣之五岔口通許之底閣等處逆氛連成一片二十五日逕趨崔橋該逆大敗走退邊馬不絕二十六日分兩營畱紮崔橋以馬步十一營裹糧疾進至石頭岡有馬賊數百迎頭而來各勇爭先奮擊獲馬三十餘匹追至

油坊岡之大林賊幟密布知其有伏潘鼎立率三營爲中路戴春林率三營爲左路吳從發率三營爲右路又令唐宏成帶一營於林叢水淖中或隱或伏以爲誘賊之計該逆果出林搏戰我軍連營齊進斬擒悍賊數十名追至林後油坊岡大寨潘鼎立揮衆向南寨門一擁而上該逆翻牆北竄追殺四五百名立將大寨奪回畱二營守之餘悉向前追剿甫行三里任逆率悍黨驟馬衝至萬國順帶馬隊鏖戰擊殺賊目多名其時附近寨賊俱蟻聚於十里外潘鼎新親督各營整陣以待未幾步賊從中路大至馬賊左右分抄各營如牆而進連環轟擊逆勢不支紛紛奔北追至武岡沙窩一帶各路寨賊俱遁潘鼎新因勞苦

過甚飭令收隊詰旦二十七日乘勝追剿至高陽集任賴兩股不敢停趾直竄過賈魯河以西潘鼎新因行糧已罄兵力極疲暫停休息該軍將士於盛暑深淖中忍飢追逐一日三捷聞勇丁鳧水淹斃者數十人傷亡亦復不少實屬異常出力應由臣暫行存記俟續有戰功彙案請獎臣查前此防河之策甫經議定而該逆回竄杞睢臣深慮其再竄山東則賊分兩路剿辦更形棘手幸得潘鼎新一軍迎頭截擊驅之西去仍應防守賈魯河沙河以扼其回竄之路已檄令劉銘傳潘鼎新張樹珊三軍仍如前議并添周盛波一軍分段畫守豫省諸軍分防朱仙鎮及黃河南岸一帶亦咨撫臣李鶴年迅速舉辦屢接稟報任賴

及張牛四逆均已竄至裕州葉縣以西去襄陽漸近兩股似有合併之勢劉銘傳等業已興工修浚紳民亦肯効力防河之議或可辦成惟上下七百餘里地段太長未敢謂防務旣成百無一失然臣必始終堅持此議不因艱難而自畫不因浮言而中更以求有裨時局自古辦流寇本無善策惟有防之使不得流猶是得寸則寸之道現在除防兵外尙有鮑超劉秉璋楊鼎勳劉松山張詩日等五支游兵俟河防辦成則令防河者與游擊者彼防此戰更番互換庶足以保常新之氣所有任賴逆股被剿西趨仍辦河防緣由恭摺由驛五百里馳陳伏乞

皇太后

皇上聖鑒訓示謹
奏

湘軍迎剿張逆四獲勝仗摺

同治五年八月十二日

奏爲官軍在西華上蔡等處迎剿張逆四獲勝仗恭摺仰祈
聖鑒事竊皖南鎮總兵劉松山宣化鎮總兵張詩日等剿捻大
勝臣於七月二十八日附奏大概聲明俟接稟牘再行詳奏在
案旋於途次接據劉松山等稟稱張牛兩逆自渡過沙河以西
分股竄擾西平上蔡等屬逆氛連成一片劉松山張詩日兩軍
行抵周家口爲大水所阻停住數日六月初六日拔隊沿沙河
西行十七日由歸村行至西華之萬金寨聞張逆大股在前距
寨不遠整隊徐行猝遇賊馬百餘首先衝突該軍甫開槍礮賊
卽卻退如此數次劉松山等知賊有伏飭令各營嚴陣以待行

未三里該逆大股馬賊齊至步賊亦從兩邊秫林內三道并出劉松山張詩日等麾軍力戰斃傷數百馬賊尙抵死不退復經我軍鏖戰逾時始紛紛潰敗各營追殺十餘里經過永平寨直抵上蔡之雙廟雙廟爲該逆占踞之巢守巢悍賊齊出接應兵勇混戰一時日已向暮遂行收隊就永平寨外趕築營壘與賊相持是日擒斬礮斃約逾千名十八日大雨未能出隊時有馬賊前來搦戰劉松山等伏兵要擊略有斬獲方是時各營輜重尙畱於歸村老營相距三十餘里又據生擒賊供該逆有至西平約牛落紅救援之說劉松山張詩日等以牛逆來援必由歸村經過雨路夾攻則首尾不能相顧商令十九日將老營移至

平寨該逆偵知我軍移營預伏千餘騎於萬金寨旁意圖截
取輜重幸總兵李祥和等督隊護送李榮貴易德麟合軍夾擊
將馬賊擊退斬獲多名其旁竄各村莊者亦經易致中搜剿殆
盡兩軍旣合商定進取雙廟決一惡戰二十日張詩日與李祥
和朱式雲等率隊進攻左路劉松山等率隊進攻右路該逆以
大股結圓十餘起前來迎敵張詩日飭令各營槍礮齊發力戰
時許斃賊無算漸逼漸進追過雙廟之後林中忽出賊馬千餘
包抄我軍步賊亦藉勢猛力回撲經彭秀清楊瑞堂力扼後路
擊斃馬賊百餘賊乃退卻各營乘勢猛進十盪十決該逆大敗
尸骸枕藉直追過義合寨前抵洪河岸側逼入水中淹斃者叫

號浮沈數里不絕其右路之賊劉松山分三路進剿步步穩擊追至雙廟之後該逆將馬步隊伍頓住散而復整回頭衝突將士惡戰踰時猶相持不下馬賊千餘忽自右路抄我陣後劉松山揮令易德麟從陣中橫出將馬賊截爲兩段唐光輝以槍礮連環轟擊傷斃數十馬賊悉向高粱林內遁去步賊亦因之而靡涉水狂奔劉松山飭令各營分途追殺呼聲震地該逆見官軍追剿甚急自相踐踏有奔向洪河梟水淹死者有陷入泥淖甘受刃而不拒者總計兩軍擒斬轟斃者近三千名淹斃者數又過之解散脅從千餘名奪獲騾馬器械無算此十七十九二十等日三次大獲勝仗之情形也張逆連次被創後不敢停畱

因沙河東路水勢過大遂折向西趨二十二日該軍追至歸村
二十三日及於鄆城之召陵劉松山張詩日布署既定如牆而
進該逆馬步全股來敵我軍槍礮火彈分段齊發戰不半時斃
賊甚多該逆無心戀戰劉松山等見逆勢不支各軍屢勝之後
一往直前循漯灣河直追至四合莊沿途掄斬槍斃者雖不及
二十日之多爲數亦逾二千騾馬器械拋棄泥塗者不可勝計
此又二十三日續獲大勝之情形也查點我軍七日之閒四次
猛戰劉松山一軍共計陣亡二十八名受傷一百四十三名張
詩日一軍陣亡十九名受傷九十一名其因鳧水及疲勞受病
者凡數百名據該總兵等稟報前來臣查張逆一股自近年以

來縱橫於齊豫皖鄂之間從未大受創懲此次經湘軍節次奮
擊克敵頓衰精銳損傷三分之一實足以快人心而伸天討各
營將士於盛暑泥淖之中徒涉迢征忍飢苦戰異常出力可否
容臣查明出力員弁彙案奏獎以昭激勸之處出自
逾格鴻施所有官軍在西華上蔡等處迎剿張逆獲勝緣由恭
摺由驛五百里馳陳伏乞

皇太后

皇上聖鑒訓示謹

奏

近日軍情片

同治五年八月十二日

再近日軍情任賴一股久踞舞陽葉縣之交八月初閒邊馬常至襄城郛城有回竄東北之勢劉秉璋楊鼎勳於初四日由周家口前赴郛城堵剿張牛一股經劉松山張詩日暨豫省宋慶三軍跟蹤追剿七月二十一二十二等日又在新野鄧州續獲勝仗追至南召魯山該逆被迫緊急折而奔寶豐葉縣等處邊馬至長葛洧川一帶聞有回竄東北再窺山東之意臣檄劉銘傳潘鼎新兩軍由中牟尉氏一路迎剿與長葛洧川相距甚近與劉秉璋楊鼎勳赴郛之師聲勢亦可聯絡又令劉松山張詩日兩軍跟蹤回剿鮑超由汝甯北出迎剿總以力扼東竄然後

可收兜剿之效至防河之策自朱仙鎮以下業由劉銘傳等興築堤牆工程約就八分現在一經調撥尙未能分汛地堅守如果各軍分路剿辦遏賊西趨仍當一面追剿一面防河以符初議除劉松山等新野鄧州接仗細情續行詳奏外所有近日軍情調度緣由謹附片陳明伏乞

皇太后

皇上聖鑒訓示謹

奏

捻股東竄河防無成現派軍追剿摺

同日

五年八月二十

奏爲捻股東竄河防無成現派各軍追剿恭摺仰祈

聖鑒事竊捻眾擾及長葛洧川志圖再竄山東等情

臣於八月

十二日具奏在案十三日以後屢據各路稟報張牛任賴等逆

虜聚於許州禹州一帶決志東竄

臣

所部游擊之師如劉秉璋

劉松山等軍由西路追賊而東先後趕至許州襄城而賊復迤

邐北竄防河之師如劉銘傳潘鼎新等軍八月初間分防各汛

一律工竣十一十二兩日趕赴汴梁幫修省北濠隄一段十四

日劉銘傳回至尉氏潘鼎新回至樊寨十五日據擒賊供稱該

逆欲於中秋夜由汴梁左右東竄劉銘傳等移紮朱仙鎮以上

一面牽制北路賊勢一面兼顧本管汛地十六夜瞭望火光漸
迤而北逼近豫軍長牆派馬馳探行至離汴省十餘里見隄牆
已毀塌數處詢據余承恩云二更時賊股潮湧而至撫標三營
所守隄牆當被衝破賊已竄逸東去等語劉銘傳卽派烏爾圖
那遜等馬隊向東追剿派唐殿魁一軍向北截剿未過之賊烏
爾圖那遜追至杞縣境內遇賊接仗頗有撿斬唐殿魁行至汴
城之南正遇牛逆後股當卽攔腰猛擊截回馬步賊千餘人向
南逃去由劉銘傳等先後呈報前來臣查河防陸路七百餘里
水路九百餘里地段太長自張市朱仙鎮直至黃河淨沙壅塞
卽使竭數月之力認真修防猶未敢謂百無一失臣於七月二

十八日疏內早慮及之今一處疏失功敗垂成半由於人力未周半由於賊勢過重聞信之餘實深焦憤現已檄令劉銘傳潘鼎新兩軍由虞城單縣一路劉秉璋楊鼎勳兩軍由徐州韓莊一路均赴山東跟蹤追剿又飭張樹珊一軍由徐州馳赴曲阜預備

孔林其李昭慶一軍本畱在濟甯韓莊等處防守運河計臣所調度之淮勇七軍除周盛波一軍暫畱周家口外餘均飭赴山東與羣賊縱橫追逐至運河防務自夏水盛漲隄牆坍塌七八月間又經加工修築比春閒更爲堅固差覺可恃但此次賊眾且悍四股合而爲一誓欲渡運東竄深秋水落能否堵禦完固

殊未敢必且賊蹤紛竄無定黃河防務同時喫緊相應請
旨飭下直隸督臣山東撫臣堅守黃河礮船上下梭巡屏蔽畿
輔務保萬全所有捻股東竄派兵追剿緣由恭摺由驛五百里
馳陳伏乞

皇太后

皇上聖鑒訓示謹

奏

請飭李鴻章暫駐徐州調度軍務片

同治五年八月二十三日

再密陳者捻匪行徑已成流寇難於收拾臣於本年三月奏明在案從前僧格林沁剿辦此賊馳驅四年有餘幾於無日不追無旬不戰至三年秋冬挫衄良馬盡被捻眾奪去兵力過疲將星遽隕臣奉

命接辦鑒於追逐之無濟又自度騎兵萬不逮僧格林沁之精建議設立四鎮兼議扼守運河沙河且防且剿辦理一年有餘仍無成效日夜籌思憂愧何極上年九月欽奉

諭旨派李鴻章帶兵馳赴洛陽彼時洛陽并無賊蹤而臣所帶之兵均係李鴻章所部之卒察看賊志實在東而不在西李鴻

章亦恐一離本任則糧餉軍火均無所出彼此據實奏覆事遂中止今則賊趨東路而臣駐紮周家口相距較遠且值因病請假期內萬難迅速移營徐州濟甯若移駐東路又恐賊匪折回西竄仍覺調度不靈伏查嘉慶道光年間黃河防汛之時兩江總督出駐清江半年或暫駐徐州數月至催趙漕船并有至韓莊台莊之時總督出省本有成例可否籲懇

天恩特降

諭旨飭令李鴻章攜帶兩江總督關防駐紮徐州專管本轄之徐海淮泗各府并與山東撫臣商辦山東軍務現在調赴山東諸軍皆李鴻章所部之淮勇也惟將帥帶兵剿賊非督撫手有

理財之權者軍餉必不應手湘淮各軍五六萬人食兩江之餉
剿三省之賊年餘以來李鴻章籌畫餉項百計經營而淮勇去
年僅發八關今年僅發至五月士卒已微有怨言李鴻章暫駐
徐州俟東路軍務稍鬆仍當回駐金陵或駐清江竭力籌餉乃
足以固軍心而維大局至西路現雖稍鬆亦不可不預爲籌備
臣弟曾國荃駐紮德安業已出省惟歷年賊勢在豫時多在鄂
時少捻匪若擾南汝光汝洛等屬不特鮑超可以馳剿卽曾國
荃所部諸軍亦可越境會剿可否請

旨飭下湖北撫臣曾國荃遇河南緊急時攜帶關防移駐南陽
府與河南撫臣商辦軍務遇事稍鬆仍當回駐德安或回武昌

兼籌餉項臣現駐周家口正居數省之中如中路有事臣與豫
皖兩省撫臣商之東路有事李鴻章與山東撫臣商之西路有
事曾國荃與河南撫臣商之庶可聯絡一氣呼吸相通臣才智
本短精力日衰值病體之未痊忽軍情之驟變不得不廣求飲
助冀以免於大戾附片密陳伏乞

皇太后

皇上聖鑒訓示謹

奏

河防無成請寬疏防處分片

同治五年八月二十三日

再密陳者此次捻匪全股東竄出於各處所不及料遠近震驚山東必有非常之風波中外必有紛騰之議論其在東路受害之州縣見賊從豫軍所分之汛地內竄出恐不免歸咎於撫臣李鶴年惟主防主剿意見難於遽同言是言非外議未必允當臣謹爲持平之論詳陳

聖主之前庶眾說紛紜不足以惑

天聽朱仙鎮以上豫省防兵係余承恩及撫標三營在所轄汛地失事本應從嚴參辦惟該處係屬砂地難於挑挖七月下旬始行興工時日過於迫促濠牆未能堅深兵勇不及三千人數

太單賊勢浩大不克抵禦尙屬情有可原臣是以未及查取職
名會商參辦初八日臣到陳州聞賊將東竄卽檄劉銘傳潘鼎
新兩軍赴中牟尉氏攔頭痛剿乃僅進駐朱仙鎮之北相隔稍
遠遂失機宜亦有不合惟自朱仙鎮以至槐店陸路四百里沿
河迂繞則五百餘里皆劉銘傳等糾約各淮軍晝夜修築八月
初旬一律畢工其張市以上六十里亦係砂地潘鼎新力任其
難修築堅固該兩軍又於十一十二日幫助豫軍修挖汴北二
千餘丈頗著勞勩雖未赴中牟迎剿稍失機宜而所守汛地究
無疏失劉銘傳潘鼎新均應免其置議至籌防沙河賈魯河之
議臣於六月十四日具奏未奏以前曾有一咨一函商之安徽

河南撫臣請其趕緊興辦既奏以後又有一咨一函馳商兩臣迭接喬松年李鶴年覆信均稱照議辦理並無推卸之辭厥後安徽認真修防河南未遽舉行臣在途次未之知也及接奉七月二十八日

寄諭始知李鶴年有砂多難辦之奏詢及汴南至朱仙鎮一節余承恩等甫經興工汴北至黃河一節尙未興工八月初十前後倉卒修防諸事未齊被賊攻破李鶴年辦事遲疑不無可議之處惟該撫亦大有可諒者河南各官之議均謂賊衰宜於速剿不必爲防河之謀賊勢急欲西趨不至有東竄之患幾於眾口一辭並聞京師人士持議亦多如此李鶴年惑於眾論並非

有意執拗與臣立異迨聞淮軍皖軍河防次第畢工乃續調馬德昭回防汴北而爲時已遲矣其朱慶一軍在南陽勦賊得力李鶴年不欲調回修防尙係救民水火之意該撫業經奏明在案倘李鶴年自請議處或言路譏其放賊東竄籲懇

聖恩暫予免議以觀後效

微臣

主持防河之策辦無成效分應

引咎自責惟目下不參疏防汛地之員亦宜暫緩請處察看東竄之賊情形輕重若何如果蔓延太廣局勢日壞臣當補奏自請處分甘受

嚴譴斷不冒自占地步諉咎他人抑臣更有請者本年三月賊竄山東臣會同撫臣閻敬銘堵禦運河幸無貽誤現在賊眾銳

意東趨并據擒賊供稱有限三日竄撲運防之說萬一又如同治二年竟竄東岸青萊等府議者以春能守而秋不能守必歸咎於閭敬銘交章論劾事所難免惟春閭兵力較厚警信稍緩此次兵數既單賊去尤速臣所發文報恐均到在賊後且春閭張牛先到任賴後到此次四股同往迅雷不及掩耳倘果搶竄運東閭敬銘必自請議處亦求

聖恩稍予寬假保全廉吏徐圖補救臣非敢要譽於同僚也實見流寇極不易辦又目覩四省水災飢民載道勢必紛紛從賊不待張牛等酋之擄脅氣機深爲可憂惟賴督撫和衷彼此各自引咎互相原諒協恭惕厲庶可挽回於萬一若值軍事不順

之際彼此各懷疑忌互相譏過將帥水火則事愈不可爲矣今
湘軍之劉松山與豫軍之宋慶同心苦戰親若昆弟李鶴年重
用宋慶臣因而獎勸之師克在和豫事必有起色區區愚誠伏
乞

聖慈垂鑒若夫防守沙河賈魯河本係策之至拙者臣非不知
之無奈馬隊遠不如賊自去秋以來派員七起出口買馬至今
無一匹回營全軍並無良馬卽驚馬亦嫌太少專恃步隊追剿
斷不能制流寇不得已乃出於防河之下策若賊再回竄仍當
扼防沙賈兩河遏賊不得復東庶軍務漸有歸宿仰祈
皇上預飭河南撫臣爲將來同心設防之計是否有當伏乞

皇太后

皇上聖鑒訓示謹

奏

彙陳查辦民圩擒斬捻匪摺

同治五年八月二十三日

奏爲彙陳查辦民圩擒斬著名積捻恭摺仰祈

聖鑒事竊自捻逆擾亂以來奔竄無常而時戀蒙亳老巢以爲
歸宿其節次回竄皆有誘民爲之勾引居則爲民出則爲捻若
商賈之遠行時出時歸恬不爲怪臣於雉河解圍以後卽擬查
辦民圩以清其源曾於上年七月初八日具奏并鈔告示進呈
御覽旋卽遴選各員先從蒙城亳州等屬分途試辦蒙城派委
安徽候補知縣桂中行朱名璟亳州派委卽補同知李炳濤補
用知縣薛元啟宿州派委本任知州張雲吉而佐以龍山營游
擊吳峻基阜陽派委候補直隸州知州尹沛清而佐以潁州營

游擊翁開甲飭令會同地方正印各官簡擇紳耆照臣所擬四條告示認真稽查於被脅從擒者則多方勸誠許以自新於甘心從擒者則悉力搜拏立予正法計自各該員任事之日起至本年六月底止蒙城擒獲積擒五十九名亳州擒獲積擒四十六名阜陽五名其聞或係著名擒首聚黨豎旗或係勾擒破圩殺傷多命或已降而復叛或陽順而陰逆均屬莠民之尤法無可貸臣恐拏獲後有刼犯逃遁等弊預行頒發

大令由各該員訊明卽行正法錄供具稟蒙城亳州二屬擒斬尤多辦理最善本年四五月間任賴等逆由泗宿而入懷遠牛落紅一股由永城而竄亳州皆欲回至老巢糾合黨羽該二屬

圩寨疊經各員先期開導良民知所愧悟頗以從逆爲非莠民亦知畏法不敢裝旗勾引以故該逆大股徘徊於懷遠幾及一月竟不能向蒙臺境內肆行盤踞蓋爲前此所未聞該員等勞力勞心著有成效

臣擬於黃陂案內擇尤保獎其正法各捻相應繕列清單作爲第一案恭呈

御覽以後續獲積捻再行逐案開單彙奏所有查辦民圩捻斬著名積捻各緣由理合附驛馳陳伏乞

皇太后

皇上聖鑒訓示謹

奏